

Svilup dals custs per la sanadad

Il Grischun sin buna posizun

DA LUCAS DEPLAZES / ANR

■ **Santésuisse, l'organisaziun tetgala da las cassas da malsauns, ha preschentà ier a Berna il svilup dals custs per la sanadad e la calculaziun da las premias per las cassas da malsauns. Ils pli gronds augments dals custs ha Santésuisse constatà tar ils ospitals.** Santésuisse ha calculà ils custs da l'assicuranza obligatoria per l'onn 2012. Ils custs per la sanadad publica na sajan nagut auter ch'il maletg da las prestaziuns dumandadas sin il sector da sanadad, ha constatà *Verena Nold*, la directura da Santésuisse, ier a la conferenza da pressa a Berna. La verificaziun dals custs demussia er il fatg che l'augment dals medis-spezialists haja consequenzas sin ils custs per la sanadad.

Las prestaziuns per la sanadad publica han custà l'onn passà als assicurads 25,7 milliardas francs. En media ha pajà mintgin 3259 francs premias a sia cassa da malsauns obligatoria. Cun 2,9% èn las premias s'augmentadas l'onn passà pli ferm che l'onn 2011 cun in augment dad 1,6%. Tranter 2008 e 2012 ha Santésuisse calculà in augment da 9,6%. Dapi l'introducziun da l'assicuranza obligatoria l'onn 1996 èn s'augmentads ils custs per il dubel.

Grondas differenzas tranter ils chantuns

L'onn 2012 han ils abitants dal chantun Appenzell dadens pajà 2380 francs premias a la cassa da malsauns ed ils abitants da Basilea Citad schizunt 4353 francs. Marcantas differenzas datti er tranter ils singuls chantuns e tranter la Svizra tudestga e la Romandia. Cun ina contribuziun en media da 3259 francs per persuna han las premias cuntanschi il pli aut level.

Il Grischun sin buna posizun

En il Grischun è creschida la cumpart d'ospitalisaziun staziunara per ils singuls pazients da 650 sin 652 francs. En media svizra munta l'augment dals custs per l'onn 2012 da 719 sin 728 francs. La cumpart per ils tractaments ambulants en ils ospitals grischuns è s'augmentada da 461 sin 489 francs, pia cler sut la media svizra da 546 respectiv 574 francs.

Damain custs per ils medicaments

La surveglianza periodica sin il sector

dals medicaments porta ses fritgs, ha constatà Santésuisse. Tar ils medicaments sut protecziun dals pretschs han ins realisà ina reducziun da 240 milliuns francs l'onn. Santésuisse pretendia ch'il potenzial da spargn vegnia realisà vinvant, sur tut duain reducziuns dals pretschs vegnir realisadas rigurusamain. Tar ils medicaments cun pretschs libers vul Santésuisse pajar mo la cumpart per la sostanza activa. Per arrivar ad ina meglra trasparenza pretendia Santésuisse plinavant il dretg da recurs.



Tenor Verena Nold, directura da Santésuisse, ha mintga persuna chaschunà l'onn 2012 en Svizra en media 3259 francs custs a sia cassa da malsauns obligatoria, 2,9% dapli che l'onn avant.